

Je'ej ti tyaatayu'sej a'íjna i San Pablo a'íjci i Tito

Pablo pu jatyojtye' a'íjci i Tito

1 ¹I yu'xarij a'íin ti jo'yú'xaca' i Pablo, Dios ti jimi tyí'huiire', ajta a'íin yo'ta'ítayaca' i Jesús i ti Ciriístu' pu'éen, a'íi pu na'antyíhuoj nyej nyij a'íj jimi tyu'tyáhuuiire'en mej mij tyá'antzaahuatye'en a'íimaj i Dios ti hua'antyíhuoj, majta je'en jéetze' yo'itéej muá'ra'nyij tzáahuatyi'ra'aj jime' je'ej ti een i tayi'ráj, ²a'íj tu tyicho've'ej tyej tyij júurij tá'ra'nyij jusén jime'. I Dios tiquee tyí'hue'tacaa pu a'yan tya'tóoraj jájcuaj imuáj, ³ajta ijíij, ti'íj atyojo're'nyej a'náj ti jaaxá'pui'intarej, a'íi pu taatá' tyej tyij jáamua'reej i nyúucaria'ra', a'íj pu jin a'yan tyinaata'íj nyej nyij huo'té'exaatye'en a'íjci i ti jin Dios tya'tóoraj. ⁴A'íjci i Tito, i paj nyiyóoj pu'éen a'íjci jitze i tyaj jitzán tyá'tzaahuatye' tyahua'puaj. Che' i Dios i tyaj jajvástara', ajta a'íjna i Ciriístu' ti Jesús pu'éen i ti tajapuá huatanyúj, miche' a'íin tyámua' tyimuáacha'íin, majta muaatyápua'ritye'en mua' tzajta'.

Je'ej ti tyi'tíj jin tye'entyúumua'ree a'íjna i Tito a'ájna a Creta

⁵Nyati'íj a'áa mojóoriej a'ájna a Creta, a'yaa nu huaríj pej pij ja'antyíci'tyij i ti á'ítzeeria'ca'aj, ajta pej pij séej chájta'naj pajta séej hua'antyíhuoonyij a'íijma i huásij i maj tyu'tyáhuuiire'sij u tyeyúuj tzajta', a'yájna nyati'íj tyimuaal'íjca. ⁶A'yaa pu tyúuxie've' a'íjna jimi i a'tíj ti tye'entyárutyij vástaj jime', tiquee tyi'tíj jin á'ítzeeria'aj. Ajta séej na'aj tyévi'tinye'en i íitaj, majta i yójmua'mua' néijmi'i tyá'tzaahuatye'ej, majta quee tyi'tíj hua' jitze pua'ritye'ej nusu maj quee tyihuojó'iteej. ⁷Ji'nye a'íjna i ti tyi'tíj jin antyúumua'reej a'íijma jimi i maj tyá'tzaahuatye' i Dios jimi, a'íj pu jin a'yan tyúuxie've' ti tyámua' tyi'tyúucha'íij. Juxie've' ti tyámua' tyihuojó'iteej, tiquee je'ej pua'aj tyihuojó'mua'raj, ajta quee jutahueeve'ej, nusu ti a'íijma já'jaahuatya'aj i maj junyo'se've', ajta quee janyacua'tzaj i túmii i maj je'ej pua'aj éenye'que' jaamu'é'tij. ⁸A'yaa pu tyúuxie've' ti a'náj

tina'aj jajxié'vi'ra'aj ti'ij huo'taxié've'en a'chu maj pua'máj jamuaaren, ajta tyámua' eenye'en, tiquee tyi'táj jin á'itzeeria'aj, ti tyámua' metyóomua'riaaj, ajta tyámua' tyi'tyúucha'íij néijmi'caa jimi. ⁹Juxie've' ajta ti tyámua' tyá'tzaahuatye'ej i nyúucarij ti a'yan tyi'ja'yájna, je'ej tyaj tyeríj tyaamuá'tyej, ti'ij ajta a'yan ca'nyíjra'aj tyihuo'tá'an a'ájna jime' je'ej ti tyihuá'mua'tyen, ti'ij a'ájna jin hua'antyimue'tin a'íijma i maj seequéj tyá'xaj i nyúucarij.

¹⁰Ji'nye jéehua mu séejre' i maj quee tyi'táj ja'astej, a'íi mu a'íin pué'een i maj ja'antysi'chej i junavíj, i maj a'yan tyihuá'mua'tyej a'ájci jime' i nyúucarij tiquee tyi'táj je'ej tyihua'tyáhu'i'rii, ti ajta huá'cuanamuaj. ¹¹A'íijma i maj a'yan tyí'xaj tyiche' huo'tá'ijmuj mej mij quee che' a'yan tyí'xajtaj, ji'nye jéehua mu tyihua'antyiú'nyi'raj mati'ij mana'aj i maj seequéj aja'chej, a'áj mu huá'mua'tyej i tiquee a'yan tyi'ja'yájna mej mij a'ájna jin huatyóohu'ire'en.

¹²Síj ti Dios jitze ma'can tyí'xaj ti a'áa cha'tána'aj ja'chej a Creta, a'yaa pu tyu'taxájtaca' a'íijma jimi i jutyéityeristyamua' tijin: “Néijmi'i mu tyí'hue'tacaa i Creta maj huacháatimee, majta simuáruunij, majta cuéeri'ij, majta tyámua' tyí'tyahui'na'se'.” ¹³A'yaa pu tyi'ji'récán jime' je'ej ti tyu'taxájtaca', a'áj pu jin juxie've' paj ca'nyíin jin hua'ajtyá'xi'in, mata'aj mij tyámua' tyá'antzaahuatye'en, ¹⁴ajta mej mij quee janamuajra a'ájci i nyúucarij tiquee tyi'táj je'ej tyi'tyáhu'i'rii, ti a'íijma jitze eeráanyej i maj Israel jitze ajtyáma'can, nusu je'ej maj tyí'ijta a'ájna jime' i tiquee a'yan tyi'ja'yájna. ¹⁵A'íijma jimi i maj tyámua' een i jutzájta', néijmi'i pu tyámua' tyí'een i Dios ti tyú'taahuaca', majta a'íimaj i maj quee tyá'tzaahuatye', majta quee tyámua' een i jutzájta', capu tyi'táj séejre' ti naa een, ji'nye camu tyámua' metyityoomuámua're'. ¹⁶A'yaa mu tyityóomuajtyej maj jamua'tyej i Dios, maj majta quee jamua'tyej, ji'nye camu a'yan ricij je'ej ti i Dios tyá'xie've', je'ej mu pua'aj tyihuojó'sej, majta quee tyi'táj ja'astej, camu tyi'táj huayí'tin ti tyámua' een.

I nyúucarij ti tyámua' een mej mij a'ájna huo'mua'tyej

2 ¹Ajta je'ej paj tyi'táj tyihuá'ixaatye', a'yaa pu tyúuxie've' paj a'náj tina'aj tzáahuatyi'ra'aj jin tyámua' tyihuá'ixaatye'. ²Ajta i huásij jimi a'yaa pu tyúuxie've' maj tzáahuatyi'ra'aj hua' jimi tyí'cha'íij, majta quee tyi'táj jin á'itzeeria'aj, majta tyámua' tyá'tzaahuatye'ej, ajta maj huo'xié've'en i juxa'aj tyeétyee, mata'aj mij néijmi'i jin tyámua' tyo'táviicue'. ³A'yaa pu cha'tána'aj tyi'huóoxie've' a'íijma jimi i ucaríijsee, mej mij majta tyámua' tyityetyúucha'íij, capáj tyi'tá'care'en maj je'ej pua'aj tyúuxajtaj séej jamuán majta séej, nusu maj jaya'care'en i nahuáj, sulu miche' tyámua' tyityetyúucha'íij, ⁴majta huo'mua'tyej i maj úucaa maj huo'xié've'en i jucínastyamua', majta i juyójmua', ⁵maj tyámua' metyityoomuámua're'ej majta

quee juxana'ciria'aj, maj tyámua' tyí'tyechej, mej mij huá'astyaj i jucfnastyamua', ta'aj ij quee a'tíj je'ej pua'aj tyihuá'xajtaj i nyúucaria'ra' jimi i Dios.

⁶A'yaa paj pajta tyihuó'mua'tyej mej mij tyámua' tyityetyúucha'íij ⁷néijmi'i jime', pajta muáaj a'yan tyihuó'mua'tyej je'ej maj tyámua' huárinyij. Pajta a'yan tyihuó'mua'tyej tzaahuatyí'ra'aj jime', je'ej maj tyí'tíj uurej, ⁸a'yan petyihua'ixáatye'ej amitéeria'can jime', ta'aj ij quee a'tíj je'ej pua'aj tyihuá'xajtaj. A'yaa pu tyu'tóotyevi'ra'astaj a'ájna i ti je'ej pua'aj tyihuá'xaj, ji'nye capu je'ej tyu'tái'riitarij ti je'ej pua'aj tyitaaxáj ityájma.

⁹Pata'aj a'yan tyihuo'té'exaatye'en a'íimaj i maj ca'nyéjrij jin tyí'huíire', mej mij huá'astyaj a'íijma i maj tyihuá'ijtye', mej quee je'ej mana'aj tyihuá'jeevej. ¹⁰Miche' quee tyihuá'nahue'raj, sulu mej mij tyámua' eenye', mej mij a'ájna jin a'yan tyu'tóosejrataj maj tyámua' tyihuá'mua'tyej je'ej ti tyé'ijta i Dios.

¹¹Ji'nye a'yaa pu i Dios tyaatasérajtaca' i ti jin tá'cu'vej néijmi'caa i tyeítyee. ¹²A'ájna i ti jin Dios taxie've', a'íi pu tamua'tyej tyej tyij meyóohuaxij néijmi'i i ti je'ej pua'aj tyí'een, i tyaj jaxie've' i cháanacaj japua, tyata'aj tyij tyámua' tyi'tyítacha'íij tyahua'xié've'ej i Dios jimi, ¹³asta na'aj quee a'ájna atyojo'rén'yej i tyaj jin huátatyamua've'en je'ej tyaj tyí'tíj tyí'ijchó've', a'ájna tí'ij yan huataséjre'en a'ájna i Dios i ti néijmi'i jin antyúumua'reej, ajta a'ájna i Jesús ti ajta Ciríistu' pué'een. ¹⁴A'íi pu huamu' tajitzé ma'can, tí'ij néijmi'caa táahuíire'en, ajta néijmi'i tyitacáa'ri'ri' i tyaj jin á'itzeere', tyej tyij a'ájna jitze ajtyáma'cantaj tá'ra'nyij, a'ájna jime' tyej tyámua' huárinyij.

¹⁵A'íi pu a'íin pué'een i ti juxie've' paj huo'mua'tyej, pajta ca'nyíjra'aj huo'tá'an néijmi'i jime' i paj jin antyía'mua'reej. Capáj tyí'tá'care'en ti a'tíj muá'xaahuataj.

Je'ej maj huárinyij i maj tyá'tzaahuatye'

3 ¹Pata'aj huo'té'exaatye'en i tyeítyee mej mij hua'rá'astijre'en a'íijma i maj tyí'ijta, miche' a'yan huárinyij je'ej maj tyihuá'ijtye', majta a'náj tina'aj tyámua' eenye' mej mij xá'pui' huárinyij. ²Miche' quee je'ej pua'aj tyihuá'xajtaj i juxa'aj tyeítyee, miche' tyámua' eenye' i jutzájta' majta hua'cu'vej, mej mij majta quee óotzaahuatye'ej a'íijma jimi i séecan.

³Ji'nye jájcuaj ímuáj tu tyajta ityáj a'yan éenye'ej, catu tyí'tíj mua'reeriaca'aj catu tyajta tyí'tíj já'astyajca'aj. A'yaa tu éenye'que' je'ej pua'aj tyí'tyechajca'aj tyahua'ajcha'íiria'aj i taxa'aj tyeítyee, majta a'íin tájcha'íiria'ca'aj ityájma, tyajta tajíimua'aj tájaaxiejvi'raca'aj séej jamuán tyajta séej. ⁴Ajta a'ájna i Dios i ti tajapua' huatanyúj, a'íi pu jaataséjrataca' i ti jin naa tojo'mua'raj,

ajta i ti jin taxie've' néijmi'caa i tyaj a'yan séejre' i cháanacaj japua, ⁵tyij tyajta quee tyi'táj jin xá'pui' tyámua' huaráj, sulu a'áj pu jime' i ti a'áin tá'ancu'vaxij, ajta tyitacáa'ri'ri' i tyaj jin ootyá'itzee, a'áj pu jin jájcuacan i júuricamej taatá' a'ájna jitze ma'can i júuricama'ra' i Dios. ⁶Ji'nye a'áj pu jitze ma'can i Jesús ti ajta Cirístu' pu'éen, jéehua taatá' a'ájna i júuricama'ra' i Dios, ⁷ajta tyati'ij quee che' tyi'táj jin á'itzeere' a'ájci jimi a'ájna jime' ti a'áin tá'ancu'vaxij, a'yaa tutyij tyi'ijchó've' ti táaci'tyij tyaj jimi júurij tá'ra'nyij jusén jime'.

⁸A'yaa pu tyi'jiré'can jime', a'áj nu jin a'yan tyá'xie've' paj jéehua huó'ixaatye'en, mata'aj mij a'áimaj i maj tyá'tzaahuatye' i Dios jimi tyámua' huárinyij. A'íi pu néijmi'i naa tyé'en ajta néijmi'caa jimi tyi'tyáhu'rii. ⁹Capáj huá'namuajraj a'áijma i maj cha'mana'aj tyí'xaj, ajta je'ej maj tyi'táj tyí'xaj a'áijma jimi i tahuásij i maj anaquéej a'yan huacháatima'caa, majta i maj tyúu'ihuo' a'ájci jime' je'ej ti huatóomua'aj i yu'xarij i Moisés ti jo'yú'xaca'. Néijmi'i i ti a'yan tyí'een capu tyi'táj huiire' ajta quee je'ej huatóomua'aj.

¹⁰Tipua'aj a'táj tyi'táj je'ej pua'aj uuriáj i tyeyúuj tzajta', pata'aj jaatá'ijmuj séej na'ríij hua'puaj pua'máj, ajta tipua'aj quee muáanamuj, a'yaa paj tyaaté'examatye'en tiquee che' ajo'rénnyinyiica'an, ¹¹a'yaa paj tyáamua'reej ti a'ájna i a'táj arí je'ej pua'aj tyo'cájruij, ti'ij ajta i xána'ciria'ra' je'ej pua'aj joorej.

Pablo pu ja'ixaatye' a'ájci i Timoteo je'ej ti huárinyij

¹²Nyati'ij muéetzij jimi jaata'ityej a'ájci i Artemas, nyajta a'ájci i Tíquico, pata'aj jiye'tzín a'áa nyojo'tyéesej a Nicópolis, ji'nye a'yaa nu tyaaxá'pui'intarej nyaj a'yan huácatyij ti'ij na'aj tyu'séevi'ij ta'mej. ¹³Pata'aj néijmi'i jime' huotáhuire'en a'ájci i Zenas, pajta a'ájci i Apolo, pajta tyihuo'tá'an tyi'táj ti huá'itziitye' mej mij huaju'un ta'aj ij quee tyi'táj á'itzeeria'aj hua' jimi. ¹⁴Majta a'áimaj i tatyé'ityeristyamua' a'yan tyaari'rej maj tyámua' tyu'muárie'en tyi'táj jime', majta tyu'tyáhuire'en jo'tij tyi'táj já'itzeere'.

¹⁵Néijmi'i i maj nyajamuan yahuatyú'uj, a'áí mu yámuatyoytye'. Pata'aj huotatyójtje'en tajíme' a'áijma i tyaj hua'xie've' i maj a'yan cha'taj mana'aj tyá'tzaahuatye'. Che' Dios tyámua' tyaja'muahuiiria'aj néijmi'caa mua'ajmaj.